

續  
文  
獻  
通  
考

讀史獻通考卷之六十六

皇明進士雲間王圻纂輯

節義考 忠臣五

皇明洪武死事諸臣

花雲懷遠人洪武庚子閏五月僞漢陳友諒陷太平雲爲  
行樞密院判被縛雲奮身大呼縛盡裂奪刀殺賊五六  
人賊眾悉雲縛於舟檣射之雲罵賊至死不變

張德勝合肥人洪武初陳友諒襲金陵戰死追封蔡國公  
謚忠毅

耿再成五河人洪武初以院判爲苗將李祐之賀仁德等  
所獲罵賊被害

趙德勝洪武初以平章爲陳友諒圍南昌效死時知府葉琛皆以守城死千戶張子明軍士捨命王以使事死

韓成虹縣人洪武初以爲帳前總制都指揮時高廟及

陳友諒大戰于鄱陽湖事急成假高廟冠服赴水死

賊遂退時戰死者樞密院判丁普郎院判張志雄總軍

元帥朱貴陳兆先副元帥俞永昌文貴王勝李信萬戶

程國勝千戶姜潤鎮撫曹信等凡三十六人

俞通海吳元年爲平章征張士誠中流矢卒

康茂才吳三年從征漢中戰死

廖永安吳三年爲平章征姑蘇以守節死時指揮茅成亦

攻張士誠于姑蘇婁門左脅中箭死

漢真洪武十年征高麗被執不屈死之

孫興祖洪武三年兵次三不刺川遇胡兵力戰死于五郎

口

曹良臣洪武中封宣寧侯五年六月追虜至土刺河戰死  
時指揮周顯常榮張耀俱戰歿

章存道洪武中指揮五年七月遇虜于斷頭山戰死

濮英中軍都督僉事洪武二十年殿大軍還道爲虜所執  
自剖腹而死

黃政洪武中僉都御史二十二年五月從征雲南還次普  
安遇寇與其子雍皆死之

王鼎儀真人趙忠之養子忠戰沒襲其職復姓王守太平

陳友諒攻太平力戰死之追封太原侯

朱顯忠如臯人嘗爲張士誠將守松江洪武初以城降從征有功授濠梁衛指揮僉事調守文州會西寇攻城顯忠力戰死贈鎮國將軍都指揮使

周顯合肥人陞驍騎左衛指揮洪武中從副將軍李文忠進兵阿魯渾河與虜戰沒迎柩賜葬

徐明合肥人國初爲百戶陳友諒攻洪都之新城門從指揮薛顯開門突戰被執死之追封合肥男

桑世傑無爲人爲樞密院判攻張士誠奮戈誓必克其城躍馬陷陣遂死之追封永義侯

王愷當塗人天兵克衢州命兼總制及胡大海爲行

省叅政愷爲郎中吳將呂珍決諸暨堰水灌城大海奪  
堰水灌珍珍勢蹙誓解兵愷曰彼狡謀勿聽大海不忍  
食言竟引還珍果敗盟大海及愷俱被害追封愷當塗  
縣男

王禕義烏人累官至翰林待制兼國史編修奉 命使雲  
南爲梁王杞都所害正統間贈翰林學士謚忠文

胡深龍泉人 本朝師至處州卽迎見曰吾所以爲此者  
欲郡邑之民安耳召至京擢浙東郎中總制處州以征  
福建陳友定遇害追封縉雲伯

葉琛麗水人歸附 本朝授管田司僉事守洪都寇陷城  
琛遇害追封南陽郡侯

劉廣羅田人洪武中以軍功爲指揮僉事守永平胡騎入  
寇廣率四十餘騎與遇于城北力戰死之事聞 賜其  
家楮幣以葬

劉林涼州衛百戶衛之西北五里有質融臺洪武初土官  
也先帖木兒叛涼州境林力戰死土臺旁 上嘉其忠  
遣祭臺下人遂改名劉林臺

關敏南海人 本朝師下全城歸附授巡檢後爲餘寇攻  
陷死之舉家二十口皆被害事聞贈兵馬副指揮 命  
有司立廟歲祭

牟魯青州府莒州同知洪武初青州民孫古朴等聚衆爲  
亂襲莒州執魯欲脅其降魯叱曰今民皆安業汝輩何

爲自取夷戮卽悔過自新猶可轉禍爲福不然官軍至汝輩寧有遺種乎我守土臣有死而已所可惜者良民也賊未敢加害擁至城南鄒家庄魯大罵賊遂殺之事聞命厚恤其家

張文煥洪武中爲白洋鎮巡檢與胡寇戰死其妻聞之亦同日死一子貧不能自存召養于京給以父俸

鄧瑜洪武間濟南衛指揮同知將率軍士從征囑其妻曰我爲人臣當盡死節汝爲人婦能盡貞節乎胡氏許諾瑜竟歿于陣胡氏亦守節不渝旌表

曾萬中吉水人元季爲千夫長江右大亂萬中與弟粹中保障鄉里歸本朝還守吉安兵至走京師乞援授萬



中江省叅知政事弟粹中親軍指揮使後城陷兄弟皆戰死

于光都昌人從本朝征九江戰鄱陽降武昌皆有功累官鷹揚衛指揮使移守鞏州王保保襲蘭州光帥兵往援猝遇敵戰敗被執使呼蘭州降光大呼曰公等堅守大軍至矣敵怒遂遇害詔配享功臣廟

許瑗樂平人會試不第放浪吳越間本朝初求賢瑗與宋濂同赴召奏對稱旨授博士留帷幄中叅預謀議尋命知太平府瑗至勵士卒修城池撫黎庶陳友諒攻太平拒守彌月城陷被執不屈死之追封高陽郡侯張子明國初爲千戶從大將守洪都陳友諒來攻子明

潛出請京師請援兵既還爲友諒所獲使誘城降子明  
僞許之至城下大呼曰大軍且至宜固守以待友諒怒  
殺之事聞追封忠節侯

孫炎句容人長身跛一足博學善辯論長于歌詩 本朝  
初建請延寵英才以圖大業從征浙東以功授處州總  
制後爲賊執管使降炎大罵不屈賊怒拔刀叱解衣炎  
曰此紫綺裘 君所賜者我當服之以死遂被害追封  
丹陽男

皇甫斌壽州人任遼海衛指揮同知爲人勇有智畧遇警  
急不避險艱身先士卒適虜寇犯邊領軍禦之至密城  
東峪與寇遇交戰自旦及晡斌氣愈銳戰愈力以矢盡

死子弼從戰以身衛父亦死事聞 詔褒恤之

建文死事諸臣

郭資建文元年秋七月癸酉 成祖兵起布政郭資都指揮張信謝貴侍郎張昺長史葛誠伴讀余逢辰俱不屈死之

莊得建文初爲都指揮隸宋忠麾下懷來之敗惟得一軍獲全盛庸戰夾河得力戰助庸斬譚淵已而北兵乘暮掩擊得力戰以死

陳質建文初充叅將守大同靖難兵至懷來質以師助宋忠忠敗退守大同後被執不屈死

楚智洪武中都指揮建文初從李景隆禦靖難兵死于夾

河之役

皂旗張係都指揮力挽千斤建文中禦北兵轉戰山東屢有俘馘至夾河力戰死猶執皂旗不仆軍中皆異之崇剛揚州衛指揮使靖難兵至城下悉力固守爲城中懷貳心者所縛以不屈死

宋瑄鄆國公宋晟子也建文中以指揮禦北兵有功靈壁之戰躍馬先登斬首數級已酉諸營兵敗瑄尤格鬪力屈死之

曾濬薊州衛鎮撫建文中與馬宣守州城靖難兵攻之不克爲張玉所執不屈死

姚善安陸人洪武末守蘇州時稱大治爲列郡最靖難兵

至抗大義以死

練子寧新淦人洪武乙丑對 大廷極言 朝失無忌避

太祖嘉之擢第二自少以名節自砥礪建文初拜吏部侍郎多所建白尋改都御史靖難兵起 廷斥李景隆賣國秘謀後以不屈族誅姻戚被逮論死者百五十人戍遠方者數百人

鐵鉉鄧州人初爲五軍斷事奏對詳明 太祖嘉之每法司有疑獄久不能決者屬鉉片時而剖尋擢山東叅政靖難兵至城圍月餘不下每以計解 文皇知不能克乃棄去後 登極擒至令一顧不可得去其耳鼻亦不顧碎分其體死尚厲聲喃喃不絕

方孝孺寧海人讀書務精思力踐擔荷綱常羽儀斯文士  
類推服建文君倚重之靖難兵入以袞經哭 禁掖屬  
草 詔抗拒不從被戮夷三族死者八百四十七人時  
溧水人刑部尚書魏澤謫寧海典史悉力保護以故方  
氏有道言謝文肅公謂孫枝一葉澤之力也後過孝孺  
故居爲詩悲悼云笏與衡雨過侯城撫景令人感慨生  
黃鳥向人空百喙青猿墮淚只三聲山中自可全高節  
天下難居是盛名却憶令威千載後重歸華表不勝情  
高巍遼州人宕軼負氣建文初藩檄未作疏論時政借  
漢爲喻欲定經制極數千餘言及靖難兵起願使燕軍  
上書亦極數千餘言陳說大義慷慨不顧危禍書再上

不報 文皇臨御自縊驛舍死

黃子澄分宜人少務學有俊聲建文初爲太常卿諸藩不靖澄與本兵協圖靖難師起遣將調兵多出指畫及大將李景隆敗奔澄哭諫當特誅不聽已而徐凱盛庸相繼敗澄捫膺大慟曰大事去矣後以北檄攻急澄借謫南徼以圖募兵 文皇踐祚族誅一子易姓田奔咸寧齊泰溧水人建文中爲兵部尚書初 太祖召問邊將姓名泰歷數無遺又欲考諸圖籍出袖中手冊甚悉 太祖大漸將傳位建文泰預受 顧命靖難兵起泰戮力竭心嗣君惟召學士輩討論周官法度處 便殿弄柔翰事遂不可支泰竟族誅

景清直聲人氣個儻擔負大節民有女爲妖所憑清館其  
家書景清在此四字粘其戶妖竟滅 文皇御極死事  
者甚多公爲都御史獨晏然侍朝人以其素少之一日  
早朝星者奏文曲犯帝座甚急 文皇意固疑清及見  
清着緋衣遂檢之得所帶劍不屈而死

周是修建文中爲紀善博學富著述孝友忠信非義不取  
靖難兵起陳論大計及指用事者誤國衆共讓挫之屹  
不爲動 文皇師駐金川門 宮中悉自焚乃留書其  
家別其友江仲執解縉胡廣蕭執楊士奇付以後事入  
應天府學自縊死

暴昭山西潞州人爲北平叅政時防藩府甚嚴遷刑部侍



郎克北平採訪事甫至境聞變亟歸以聞請預爲備建  
文元年設平燕布政司於真定陞昭別部尚書掌司事  
平安諸兵敗召歸京師靖難兵入城出亡被執見成  
祖抗罵不屈去齒截手足罵不絕口至斷頭乃已

侯泰順德南和人累官至刑部尚書北兵起泰督餉山東  
濟寧不守輜重船沒還京建文四年又出淮安總軍餉  
得便宜行事京師告急泰還至高郵被執下獄是年七  
月十日死之弟敬祖子玘皆死籍其家幼子京兒永樂  
九年猶繫錦衣獄

卓敬戶部侍郎建文初燕三來朝敬密奏裁抑宗藩  
畧曰北平者強幹之地金元所出與也宜徙燕封南

昌以絕禍本建文君覽奏大驚語敬曰 燕王骨肉至親卿何得此言曰楊廣隋文非父子耶建文君默然事竟寢卓嘗抑姚廣孝 成祖執敬欲殺之而憐其才曰敬欲徙朕內地建文若聽其言則干戈息矣廣孝曰不然南昌地居下流金陵加兵特囊底探物耳使敬言用上豈有今日哉 上乃殺敬敬臨刑從容嘆曰變起宗親畧無經畫死有餘罪神色凜然經日如生夷三族胡子昭刑部左侍郎建文四年九月死臨刑詩曰兩間正氣歸泉壤一點丹心在帝鄉時年四十一

郭任戶部侍郎調兵食北兵入金川門任不屈而死盧迥戶部侍郎靖難後被縛不屈臨刑長謳而死聞者悲

之

黃魁禮部侍郎靖難初不屈死之

茅大方泰興人建文元年擢右副都御史北兵起遺詩淮南守將梅殷云幽燕消息近如何聞道將軍志不磨縱有火龍翻地軸莫教鐵騎過天河關中事業蕭丞相塞上功勲馬伏波老我不才無補報西風一度一悲歌四年八月被執死之

周璿諸城人建文初以神策衛經歷言事擢左僉都御史靖難後不屈死之妻子沒官

司中洪武三十年擢左僉都御史建文時死事

彭與民萬安人大理寺丞時擇知兵有風裁者督察諸將

推與民出淮西至靈壁會何福戰敗被執與陳性善同死一曰名與明

胡閏鄱陽人建文中爲大理少卿靖難兵起數與齊黃議軍國事壬午七月不屈死之籍其家

盧原質寧海人母方孝孺姑也任太常少卿事建文君屢有建白靖難後召見不屈死之弟原朴論死族其家

陳繼之莆田人戶科給事中北兵起建白指斥徐增壽陰謀北兵入城不屈而死

韓永西安人戶科給事中靖難後杜門不出召入見不屈就死

戴德彝奉化人左拾遺北兵起與方黃畫兵事靖難後不

屈死

高翔朝邑人監察御史靖難後召翔翔服喪服入見大哭語又不遜遂族翔沒其產諸給高氏產者皆加稅曰令世世罵翔也

王度歸善人監察御史北兵南下勅度勞軍徐州北還鳳陽失守方孝孺與度書誓死社稷四年七月坐奸黨謫戍賀州語不遜坐死夷其族

甘霖懷寧人舉鄉貢擢監察御史靖難師起被執死之謝昇沛縣人建文時爲御史練兵給餉靖難後不屈死葉希賢監察御史松陽人靖難後坐逆黨死

董庸監察御史倡諸御史劾將校懷二心不力戰者輒彈

劾之靖難後爲衆所持謂庸逆黨論死

王玘蘇州人監察御史永樂時以匿革除奸黨子孫被誅  
巨敬平涼人戶部主事靖難後被逮責問不屈死之夷其  
族

宋徵宗人府經歷靖難後縛至不屈死并殺其妻子

黃彥清國子博士以在駙馬都尉梅殷軍中私謚建文君  
坐死

李文敏蔚州人永樂初以奸黨誅

湯宗爲北平按察僉事上言北平按察使陳瑛受王府  
金錢有異謀逮瑛謫戍廣西靖難後瑛召還窮治建文  
諸臣多坐夷滅宗亦論死

葉惠仲臨海人建文初克史官永樂元年二月二十二日  
曰坐修實錄時書靖難事爲逆黨論死籍其家

陳彥回莆田人徽州知府北兵至江上彥回募義勇入援  
事平被繫爭以大義而死籍其家

程通績溪人遼府左長史建文君遣人至荊州通上防禦  
北兵數千言成祖卽位術士紀綱爲錦衣衛指揮使  
乘間言通曩有封事指斥遂械通至京論死

耿璿長興侯炳文子尚懿文太子長女江都郡主爲駙  
馬都尉掌前府事建文君遜去璿杜門稱疾竟坐罪死  
耿璿長興侯仲子官至後軍都督僉事楊文守遼東璿數  
請攻永平以動北平文不聽靖難後璿論死

張倫河北諸衛指揮建文元年十二月薊州衛官起兵攻  
北平不克而死倫聞之發憤合兩衛官率兵南奔結盟  
報國初從李景隆已而從盛庸並有功靖難後死之  
王資以指揮從偏將防守淮北靈壁之役率步卒護軍餉  
諸將兵敗被執遣還京遂走鳳陽靖難後追罪廢死  
倪諒燕山左護衛千戶上變告逮 燕府官校于諒周鐸  
等皆伏誅沒產靖難後諒死之

周拱元沅州人錦衣所鎮撫軍前差遣占侯輒中主將令  
引步兵防餉舟靖難後死之

陳思賢茂名人漳州府學教授靖難 詔至勸哭曰明倫  
之義正在今日遂堅臥不出迎率其徒伍性原陳應宗



林珏鄒君默曾廷瑞呂賢卽明倫堂爲舊君位哭臨如  
禮郡人執送京師思賢暨六生成以身殉

徐輝祖中山王長子魏國公北兵至江上輝祖及開國公  
常昇分道出師禦戰 成祖入金川門羣臣勸進獨輝  
祖不屈 成祖親召問嘿不應下吏令自招罪操筆惟  
書其父開國功及券詞子孫得免死耳 上大怒削爵  
秩勒罷尋下獄卒

劉瑞南昌人建文二年進士與鄉人王高同年同爲大理  
寺左寺丞坐縱方孝孺息樹陰俱梟鼻而死

鄭公智寧海人建文初從孝孺至京舉賢良爲監察御史  
靖難後坐方黨論死

鄭居貞其先徽州人河南試左叅政永樂初坐方黨死

林嘉猷寧海人陝西按察僉事嘗被 成祖召居燕邸最

久知三郡王素傾世子以告孝孺孝孺言之建文君遣  
錦衣千戶張安持書詣燕許世子王燕燕內使黃儼因  
問世子計且得行世子竟先發事遂洩靖難後坐方黨  
逮至京建文四年九月死

黃希范爲徽州知府北兵起大修武備金川門失守素服  
不治事後坐與程通善嘗共議條上防禦策爲錦衣邏  
卒捕去論死籍其家

廖鏞巢人歷官至都督建文中與議兵事時宿衛 殿庭  
靖難後 成祖以廖侯兩子鏞與銘嘗受學方孝孺令

召之孝孺怒曰汝讀幾年書還不識箇是字兩子復命  
上怒令收孝孺族誅之廖兩子拾遺骸葬聚寶門外  
山上甫畢廖氏見收兩子逝去永樂元年四月錦衣衛  
奏獲鏹送刑部論死

黃觀貴池人禮部侍中掌尚寶司事與方齊並見信用北  
兵起觀草詔極其詆斥建文四年觀奉詔募兵安慶且  
督諸郡勤王至李陽河聞建文君遜位衣冠號泣東向  
再拜自沈于羅刹磯下

廖昇襄陽人太常少卿聞茹瑺等龍潭還慟哭與家人訣  
自經死

王叔英黃巖人翰林修撰北兵至淮上游兵逼江干建文

君遣使四出叔英募兵廣德間建文君遜位慟哭會齊  
泰奔叔英曰泰二心矣令執之泰至告之故乃相抱慟  
哭與泰圖後舉知事不可爲乃沐浴衣冠書絕命詞藏  
裾間自經於玄妙觀銀杏樹下詞曰人生穹壤間忠孝  
貴克全嗟余事君父自省多過愆有志未及竟竒疾忽  
見纏肥甘空在案對之不能嚙意者造化神有命歸九  
泉嘗念夷與齊餓死首陽巔周粟豈不佳所見良獨偏  
高蹤邈難繼偶爾無足傳千秋史官筆慎勿稱希賢又  
題其案曰生旣久矣未有補於當時死亦徒然庶無慚  
於後世

王良祥符人歷官刑部左侍郎建文三年問燕國人罪從

未減遷浙江肅政按察使至浙江謁岳鄂王墓誓曰苟  
愧武穆非人也建文君遜位大慟九月 詔召良良執  
使者將斬以徇爲衆劫去良乃集諸司印于私第嗟嘆  
者久之妻問故曰我分應死未知所以處汝耳妻曰我  
何難遂愧良食抱其子欲飲如廁置其子池旁自投池  
死良殮妻畢卽列薪於戶寫遺囑付家人令妾抱幼子  
逃匿以存宗祀遂舉火闔室自焚死

顏伯瑋名瓌廬陵人知沛縣北兵入東門指揮王顯迎降  
伯瑋冠帶升堂南拜慟哭曰臣無能報國乃自經死

陳性善山陰人北兵起性善爲副都御史監李景隆軍建  
文四年三月辛巳戰靈壁敗績與彭與民劉伯完王資

皆被執 成祖縱之歸性善躍馬入河死後加追戮  
王良吉水人翰林修撰初聞北兵起輒爰不食日羸憊及  
渡淮閉門涕泣不已訣妻子曰吾不可復生豈能復顧  
汝等服毒死建文君哀其忠遣禮部侍中黃觀 諭祭  
鄒瑾永豐人任大理寺丞北兵至徐增壽約開門降瑾與  
魏冕等廷毆之幾死靖難後自殺 詔夷其族

魏冕永豐人建文時爲監察御史北兵至金川門徐增壽  
約開門降冕與大理丞鄒瑾率同僚十八人卽殿前毆  
之幾死會輟朝冕及瑾大呼請速加誅臣等義不與此  
賊同生不聽明日 宮中火起或謂冕宜急迎附冕毅  
色厲聲曰使吾改臣節徒自壞也靖難後冕與瑾自殺

法官請追罪 詔夷晁族

曾鳳韶廬陵人建文初爲監察御史會 藩王來朝馳

皇道入且不拜鳳韶侍班言 殿上宜展君臣之禮

宮中乃敘叔姪之倫由 皇道不拜大不敬建文君曰

至親勿問北兵逼議遣書於燕使罷兵息民無敢行者

鳳韶慷慨請行姚廣孝勸却其書不報靖難後 召復

御史不至尋加吏部侍郎 召又不至刺血書憤詞襟

上曰予生廬陵忠節之邦素負剛鯁之強讀書而登進

士第仕宦而至繡衣郎旣一死之得宜可以含笑于地

下而不愧吾文天祥屬妻李及子公望曰我死勿易衣

遂自殺李亦自經死

龔太義烏人都給事中 成祖渡江太與妻傳訣曰事至此我自分死爾第攜幼穉歸否則俱溺井無辱也俄宮中火起太馳赴爲兵校所執見 成祖金川門以非奸籍得釋太自投城死 成祖大怒立 命軍卒剉其屍黃鉞常熟人建文中授刑科給事中改禮科父喪將歸方孝孺問曰北兵日南蘇常鎮京師左輔君吳人 朝廷近臣宜有以教我鉞曰蘇州知府姚善忠義激烈能當一面孝孺因附書于善期戮力王室善得書與鉞相對慟哭以死自誓北兵至江上善受建文君詔總蘇松常鎮嘉興五郡兵勤王以書招鉞鉞卽日營塋事竣遂至善所靖難後 詔捕善急善麾下許百戶素權詐得親



善縛善邀賞鉞聞善死慟哭起登琴川橋西向再拜祭  
善畢給家人歸祭具自投琴川橋下而死

何申爲中書舍人建文末使四川至峽口聞金川門不守  
發憤慟哭吐血不數日疽發背死

程本立江西按察副使聞北兵入金川門自縊死

王省吉水人浮梁教諭母喪復除睢陽八年又改濟陽北  
兵至省爲游兵所執從容引譬詞義慷慨衆舍省省歸  
坐明倫堂伐鼓聚諸生謂曰若等知此堂何爲名明倫  
今勿多論且說君臣之義何如省大哭諸生亦哭遂以  
頭觸柱死

劉璟基之子爲谷府長史并提調 肅遼慶寧燕趙 六

王府事璟嘗至燕與 成祖對奕 成祖曰卿獨不少  
讓我耶璟正色曰可讓處璟不敢不讓不可讓處璟不  
敢讓也北兵起璟馳還家獻十六策不聽還家養疾建  
文君遜位璟稱疾不起法官諭璟逃叛逮至京見 上  
猶稱殿下 詔獄辯髮自經死

樓璉金華人翰林侍讀北兵入京 命方孝孺草詔不從  
改命璉惶懼應命歸自經死

楊本建文中精於道法授錦衣鎮撫持一鐵棒重三十斤  
禦敵皆披靡每帥孤軍獨出被擒繫北平獄 文皇攻  
濟南失利奔還北平恐人心動搖索本諄之

毛太建文元年代王謙爲吏部左侍郎靖難兵起數上封

事條陳方畧後尚書張統死太亦死

郭任廉慎有吏才建文中仕至戶部侍郎調兵食軍興不  
乏靖難兵入金川門任不屈死之

陳植廬江人建文中兵部侍郎靖難兵至植受命督師江  
上有督將密議降者植數以大義督將恨之遂遇害

李堅尚 太祖第七女嘗奉 命賑貸北平素負才勇從  
長興北進遇北兵戰互有勝負封灤城侯後戰滹沱河  
薛祿引禦中堅墜馬擒見 成祖械繫送北平道卒

平安一名保兒洪武末爲山東都指揮靖難師國濟南安  
同鐵鉉爲城守計圍解率兵追至東昌大戰禦幾及  
文廟馬蹕而止 文廟嘉其忠勇不之罪轉大寧都司

京師既定乃自經死

蔡運南康人建文中歷四川叅政清諒不諧於俗罷歸復起賓州知州有惠政靖難後論死百姓憐而思之

鄭恕清介不妄建文中取擢蕭縣知縣靖難兵破城恕死之籍其家二女亦死之子濂湜姪溫汲謫北平種田

徐讓建文中山西布政司理問有口辯應募賫書物至北平議和受而不答建文四年赴軍前差遣戰沒

衛健建文中山西孝義縣丞膽智過人與徐讓同應募使北平不答健曰願殿下熟思之亦不答還與徐讓並赴軍前差遣戰沒

俞道淵淵以父兄功充叅將有功封越雋侯建文元年召

見 上壯之曰老將也從大將軍禦北兵敢戰有功白  
溝河之役淵歿于陣

梅殷汝南侯梅思祖從子尚寧國大長公主靖難兵起殷  
克總兵官守淮安 文皇假道殷絕之 文皇乃渡泗  
水出六合至京師卽位殷尚擁兵淮上 上迫公主招  
殷殷得公主書慟哭詢建文君所在中使曰去矣殷曰  
君存與存君亡與亡吾姑忍俟之乃還京見 上 上  
曰駙馬勞苦殷曰勞而無功永樂三年冬入朝殷讐家  
都督譚深等命人擠殷筮橋下死

盧振靖難兵起與徐輝祖齊黃謀盡攻守效力爲多靖難  
兵畏之壬午秋逮至不屈榜振名數其罪殺之夷其族

劉政長洲人有經學以舉人爲沛學教諭建文元年孝孺試圻府士千五百人題命論語托孤寄命節不可奪章得政卷喜曰此烏中孤鳳當虛左處子建文遜位殺孝孺政慟哭不食死之

張統富平人雲南叅政三十一年召爲吏部尚書靖難後成祖命統輔導統出遂自經吏部後堂

馬宣建文中爲北平都指揮使靖難兵起殺張昺謝貴宣巷戰不勝走薊州起兵再戰被執死之

朱鑑建文中以都指揮守大寧城靖難兵至大寧力戰不支被執死之

卜萬謀勇自負建文中爲大寧守將文皇忌之以間書

今黨與自疑敗之下獄死

翟能建文中爲都指揮驍勇有名後從李景隆戰白溝河能父子力戰死之

宋忠錦衣衛指揮使建文元年三月勅忠以都指揮總邊兵靖難兵至忠以兵三萬至居庸大戰以死

余瑱建文中爲都指揮與謝貴密謀不遂貴死瑱走居庸且戰且守援兵不至被執遂死

孫泰以都指揮從宋忠戰懷來頗有斬獲靖難兵擇善射者射泰中矢猶力戰大呼陷陣死之

唐子清建文中爲沛縣主簿與顏知縣守沛尋調兵食靖難兵至被執不屈死之

鄭華洪武間進士謫東平吏目靖難兵起與妻訣別殉國  
率吏民憑城自守力不支援兵不至不食而死

黃謙建文中以儒生爲沛典史果敢能戰同顏知縣守城  
靖難兵至被執不屈死

陳廸宣城人通經術有志操任雲南布政大著軍績陞尚  
書疏清刑獄集流民免徭租皆切政體靖難師起被

命督軍餉卽陳論大計及 文皇登祚罵不屈同子鳳  
山等六人就戮乃熬鳳山鼻令廸食尤肆指斥

牛景先禦靖難兵數有功金川門失守遂死蕭寺中後窮  
治妻妾發教坊司

儲福無錫人初隸燕山衛卒靖難後調曲靖衛因仰天哭



曰吾雖一介賤卒今遇國難決不爲不義屈不食而死  
松江同知不知何許人勤王詔至遂出榜募義勇入援  
文廟卽位械至京磔于市

劉仲禮字用和上海縣人忠義素持盛有文譽以春秋明  
經辟召至應天遇靖難師入不食七日而死後三世孫  
璵官建寧太守

嘉靖十四年給事中楊傑言建文死節諸臣齊秦鐵鉉  
黃子澄張鉉等忠義凜然宜付史局加官贈諡錄後立  
祠禮官夏言覆建文時誤國悖正君側之惡成祖所  
討楊傑新進小生未諳大義上恕其狂直之  
永樂死事諸臣

陳文建文四年爲燕大將與南將都督何福戰敗死時指揮韓貴亦戰死

張玉建文中爲燕大將靖難兵至東昌與盛庸戰敗死  
陳亨建文中爲燕將與平安戰于白溝河被斬

劉儁字子奇江陵人洪武中進士永樂六年爲兵部尚書  
時沐晟帥師與交趾賊簡定戰大安海口敗績儁與都  
督僉事呂毅交趾布政司叅政劉昱皆死之洪熙初贈  
少傅謚節愍

郭驥永樂七年爲給事中齎書使北虜諭令通好爲本雅  
失里所殺

張益安平人永樂中由明經任刑科給事中陞禮科性質

直奏對多稱旨上目爲響張尋奉使北虜主將失利公爲虜所持不屈而死

丘福永樂七年福以淇國公帥師北征本雅失里出塞敗績福及王聰火真王忠李遠皆死之

劉忠永樂十八年三月安遠侯柳升征山東妖賊唐賽兒忠以指揮接戰死之

侯保贊皇人以國子生爲交州知府永樂十八年遷交趾右叅政廉恕得民與賊黎利力戰死之時同官馮貴亦戰死

王煥永樂二十年以都指揮守興和阿魯台入寇煥被殺楊樸全椒尹寇陷廬江入城縱火樸盡殺其妻子朝服坐

堂上盜欲降之大罵不屈而死

譚淵清流人洪武中以軍功授燕山護衛副千戶後從靖  
難戰于真定至夾河馬蹶遂死之永樂中追封崇安侯  
謚壯節

黃正礪山人爲僉都御史忤權貴出爲廬州英山縣吏平  
金山叛寇陞右僉都命討雲南叛夷降服而還至普安  
爲權貴遣賊中傷

印岳楚雄衛千戶洪武末征革石瓦那寨糧絕殺所乘馬  
以食軍士永樂間征麓川力戰而死

陳錡福安人永樂間領鄉薦拜御史監軍甘肅與虜寇遇  
奮兵大戰力乏被執大罵死之

陳士淵永樂間爲尤溪巡檢討平吳十師之亂後餘黨復突起士淵倡勇力戰于羅畚場兵敗死之

王聰斬水人洪武末以靖難功封武城侯征北虜戰死贈漳國公

陳洽武進人累官吏部侍郎佐英國公討平交趾陞兵書交趾復叛成山侯引兵渡河洽力陳利害弗聽明日與賊遇遂被害贈少保官其子樞爲給事中

易先湘陰人永樂初由太學高等選授交趾諒山知府陞按察使宣德初交趾叛攻城先嬰城固守糧盡闔家同死事聞諭祭贈廣西叅政

徐燹永樂中武岡州判官洞蠻寇亂燹率民兵出戰死之

高士文咸陽人質直剛果善騎射洪武末從平內難出入  
戰陣累陞前軍都督僉事征交趾多效勞勩取廣源州  
與賊力戰而死追封建平伯

王真咸寧人洪武中以功授燕山右護衛百戶從靖難出  
奇制勝肥河之戰斬獲無算而後隊不繼被圍數匝真  
氣愈奮斬敵數十人馬上自刃而斃追封金鄉侯

薛崑陝州閿鄉人洪武間累官大理寺卿謫廣西永樂初  
安南國王爲黎季犛所殺其孫陳天平自老撾來歸季  
犛子蒼表請還君之上命廣西都督黃中以兵五千  
送歸其國中舉崑爲輔行至芹站伏發劫天平崑被虜  
死之

劉昱東昌武城人初任吏科給事中歷陞交趾叅政與尚書劉儁贊黔國公沐晟軍務被圍與儁同死之

史安豐城人永樂初進士授禮部主事時交人再叛用薦舉入交趾總戎劉升戰沒安被執不屈死之

李遠懷遠人沉毅有膽力善騎射從軍靖難累功封安平侯征北虜突陣力戰馬蹶被執罵不絕口而死追封莒國公謚忠壯

吳克忠襲恭順伯洪熙初加侯從征虜寇力戰而歿追封邠國公弟克勤爲都督與兄同歿于陣

宣德死事諸臣

陳懷合肥人宣德中以軍功累陞左都督正統中進封平

鄉伯征虜没于陣追封侯謚忠毅

何忠郴州人永樂中進士授御史宣德元年以言事出爲交趾政平州知州至是黎賊圍鎮城藩鎮以忠有膽畧使懷奏潛請王師被執諸酋强其從忠大怒罵奪其杯擲中賊面流血盈頤遂遇害事聞勅旌其門賜謚忠節楊士奇傳云子輔倡義守城城破自經

崔聚宣德元年安遠侯柳升敗死交趾明日崔聚被圍聚固宿將倉卒賊驅象闖衆亂被執史安陳鏞曰吾輩當見危授命皆死之

劉子輔江西廬陵人初爲廣東按察使坐累左遷知交趾諒江府撫民如子民愛戴之時黎賊陷諒江子輔與守



將倡兵民死守食盡城陷城中人皆力闕以死無一人  
降者子輔知事不支遂自經死一子一妾皆先子輔死  
事聞贈子輔叅政 賜祭復其家

正統死事諸臣

方政全椒人正統四年春政以都督同鎮守雲南黔國公  
沐晟率兵討麓川不利政戰死追封威遠伯謚忠毅

陳詔正統十三年七月處州賊葉宗留反 詔以都督禦  
賊戰死

陳榮正統十三年處州賊反榮以副總兵禦賊戰歿

宋瑛爵西寧侯正統十三年七月親征也先瑛及武進伯  
朱冕全軍覆沒成國公朱勇俱被殺

張輔爵英國公 車駕北狩輔及尚書鄺埜王佐學士曹  
鼐張益皆死之

王清廣州人正統十四年七月廣州盜黃蕭養圍廣州清  
以副總兵都指揮僉事禦敵被殺 朝廷加其子世襲  
二級

恭順侯吳瑾左都御史寇深天順五年七月擊反賊曹吉  
祥姪曹欽俱被殺死贈瑾梁國公謚忠壯深少保謚莊  
愍

高雲無錫人由國子生授潭州府通判鄧茂七亂會府使  
督餉遇賊以刃脅之雲罵曰汝等無狀上勞王師下毒  
黎庶指目梟首敢殺汝父母邪遂受害

程思溫婺源人正統間進士遷禮部員外巳巳之變死于難景泰中追贈錄用其子

莊英歙縣人舉鄉貢擢廣昌知縣寇入境挺身捍禦遂遇害贈廣昌通判錄其子爲太學生

耿定和州人官刑部郎中浙江叅議正統末處州盜起定率兵勦捕死于兵贈按察副使遣官諭祭

張瑛知建寧府以征沙尤功陞叅政掌府事明年盜復倡獮瑛直抵其巢與弟敬力戰死之

雷潛建安人宣德中領鄉薦除武選司主事陞郎中死于正統巳巳之變

滕員甌寧縣人宣德巳酉鄉薦遷禮部郎中死于正統巳

已之變

張敏正統間爲尤溪主簿沙寇亂犯城敏奮力誓師出與賊戰因民兵不熟行伍且前後不援力戰死

陳順建寧人正統戊辰沙尤寇亂順集民兵與戰大勝後賊奄至順衆潰手殲十數人力竭遂遇害時邑人甯宗珮亦同死之

王用相龍巖人永樂辛丑進士歷官戶部員外正統間歸省遇沙寇亂被執不屈死之

姚銑侯官人進士宣德初給事中正統己巳之難死于土木時邑人陳鈍懷安人周傑皆進士俱以扈從死

熊尚初南昌人由吏員任都察院都事經歷正統末知泉

州府鄧茂七犯境尚初曰受命一方寇出不時由我不職寧一人受害遂單騎出城中流矢卒後有司錄其死事立祠祀焉

崔惠晉江人宣德中領鄉薦任江西石城教諭叛賊陳椿陷城惠爲所執賊逼從之惠罵曰豈從汝狗奴反耶會燬草菅卽投火焚死

李思鄒晉江人正統沙尤賊亂據黃山脅使從已思鄒叱曰我作太平百姓豈從汝作賊耶遂以義倡鄉里四百人立柵爲禦屢與賊戰俱勝一日早適天霧暝晦賊乘間攻柵衆奔潰思鄒獨率六七人力戰死之暨殮顏色如生

劉祥監利人以左軍都督府都事死正統己巳之變天順  
間錄其子

呂鏞蘄水人領宣德丙午鄉薦任福之清流知縣值流賊  
鄧茂七陷縣鏞拒之力不能支具服端坐中庭抗罵不  
屈賊支解以死邑人立廟祀之

鄧鑑黃陂人任光祿署丞正統己巳從英廟北征亡于  
陣景泰初錄其子

翟亨平溪衛指揮僉事正統中以麓川功累遷指揮使後  
復征麓川偕其弟戰死朝廷遣官諭祭

馬豫臨清人宣德中登進士官大理寺副正統己巳土木  
失利奮不顧身厲聲叱賊遇害英廟復辟憫其忠贈

寺正錄其子入監

尹昌吉水人宣德癸丑進士官至行人司正己巳之變扈

駕北征自刎而死 朝廷官其子

羅如璠廬陵人正統壬戌進士授行人己巳扈 駕北征

土木敗績死之景泰間 詔旌異錄其子

楊清正統末爲建昌所千戶聞寇煽亂廣昌告急清統兵  
勦襲瀕行以鳳仙花染足指囑家人曰他日尋吾屍以  
此爲識後與敵戰果死之

鄧顥樂昌人舉進士正統間知廣信永豐縣時閩寇犯境  
顥伏兵大破之賊悉衆至顥力戰遇害民哀之肖像于  
城隍廟祀之贈光祿卿

張益吳縣人永樂中進士授中書舍人累陞翰林侍讀正統己巳沒于王事

王永和崑山人好學能文器識宏雅永樂中領鄉薦獲主師席生徒多所造就宣德中陞兵科給事中歷工部右侍郎正統己巳沒于王事

景泰死事諸臣

陶成景泰元年五月處州賊陶得二寇武義成爲浙江按察副使戰死

毛吉餘姚人景泰中進士歷廣東僉事剿賊楊輝攻掠郡邑吉督死士破之陞副使賊衆遁于陽江我師徂勝突入失利吉死之贈按察使



楊海清城步人景泰八年洞苗肆掠邵湘海清率其妻及其徒追戰于龍王橋後援不至與妻徒俱遇害

劉實安福人宣德五年進士改庶吉士未嘗授足權門爲金華同知擢順天治中景泰中召修元史擢南雄知府商稅毫不染指因忤中貴驛奏公抗勅使詔逮下獄不數日竟卒人皆冤之

王廷桂宜章人領天順壬午鄉薦授贛州府同知巨寇流劫州縣廷桂率鄉兵禦之援兵不至死于難事聞贈官錄子

成化死事諸臣

卜馬祥岳州人成化中任指揮同知流賊掠洞庭祥奮身

督戰死之

馬鉉永新人成化中進士授工部主事陞廣西叅議會古田苗賊猖獗自將往勦出其不意斬獲過半班師歸爲伏兵夾戰竟死之 諭祭贈叅政錄子

正德死事諸臣

楊源豐城人御史楊瑄子弘治中官欽天監候正德元年奏占候得大角及心宿中星搖動天璇天機天權星不明因勸 上安居深宮絕遊戲至是復奏連日霾霧交作爲陰曷于陽臣欺于君小人擅權之象劉瑾怒矯

旨廷杖已復奏正德二年以來火星入太微垣帝座之前或東或西往來不一意在劉瑾瑾召源面叱之曰你

是何等官也要做忠臣復廷杖充軍肅州行至懷慶傷重而死妻度氏斬盧荻覆尸葬于驛後

郁永正德六年流賊趙風子破裕州永爲同知死之贈光祿寺少卿廕其一子時有上蔡縣知縣霍恩城破不屈而死真定知縣王佐棗強知縣段勇與賊戰死 朝廷憫之咸贈官 賜廕

馮禎正德七年流賊攻河南禎總兵戰歿

陳乾正德十年四月兀良哈寇馬蘭谷乾爲叅將戰死

芮寧正德十一年九月土魯番入犯寧爲肅州遊擊將軍禦之敗沒

陸震官兵部員外郎正德十四年四月伏 關諫南巡震

及行人司副余廷瓚劉校評事林公黼照磨劉珏行人  
孟陽李紹賢劉平甫李翰臣詹軾俱 廷杖死

孫燧餘姚人樸謹不外飾自刑曹 勅獻刑獄會劉瑾嫉  
公連坐贖罰正德末年江西宸濠密謀漸彰當事者擇  
公巡撫其地及謀惡大著公屢疏罪狀以聞俱爲中道  
遮匿弗能達乃與御史范輅叅議陳洪謨副使許達死  
之謚忠烈

許達固始人初爲樂陵令以靖寇功陞僉事尋轉江西副  
使時寧藩起叛兵縛巡撫孫忠烈將殺之一時官屬駭  
愕不敢言獨公反覆辯論且厲聲大罵慷慨激烈并命  
縛斬於惠民門外刑時公顧孫忠烈云早聽我言當不

至此公蓋嘗有先發後聞之計爲忠烈所阻贈左副都御史謚忠節祀旌忠祠

馬思聰莆田人弘治乙丑進士以戶部主事督糧江西因謝宸豪宴語家人曰我倘不歸將勅藏于高處人皆不論其意已而濠果怒其不從遂遇害後配享豫章旌忠祠

何孟循名遵吳江人正德中爲工部主事中官江彬導上南巡孟循與同官林大輅蔣山卿上疏請罷巡幸勿爲左右奸豪蒙蔽彬大怒下孟循等于獄尋被旨荷校暴午門外五日杖五十罷遣彬看視孟循體故羸又憤所言不達瘡潰骨糜越二日死嘉靖初贈光祿少

卿廕一子

黃宏六合人弘治進士累官江西叅議時宸濠不軌殺都御史孫燧及副使許逵以脅迫諸司宏不服以手械向柱感項而死濠誅贈宏太常少卿祀旌忠祠

吳璟南陵人舉進士官四川僉事流賊鄔藍之黨突入川東進逼江津璟受檄守之兵援後期城陷被執而死贈副使官其子鎬爲宜州衛百戶

葛琛宣城人爲清江令改瑞金流賊夜遁入城或勸避琛曰當手刃諸賊以報國恩賊擁入縣遂遇害贈光祿少卿官其子麟爲侍讀

喻江郴州百戶正德間崗寇大作江分營宜章之章橋遇

敵死之

吳昉辰州衛指揮正德間督兵征流賊行至德安應山與賊遇奮勇前驅月矢陣亡事聞諭祭加子官

胡節零陵人由行人授御史巡城山東振肅風紀適逆瑾擅權怒節守正捕下錦衣獄捶死嘉靖改元賜祭贈光祿少卿

鄧旻靖州衛指揮正德間賊逼州境旻與遇于雙魚嶺大戰力盡死之

曹鵬靖州衛指揮正德中流賊劉六等破應山縣鵬督戰力竭死之

宋以方黔陽人進士歷知瑞州府逆濠中之緊獄濠反械

趙彭謐不屈且憤罵爲濠所殺嘉靖初贈官錄子

丁泉行都指揮僉事上杭寇發泉擣其巢穴破石馬岐等  
三寨與賊遇力戰而死邑人祠祀之

曾璉江陵人正德初以吏員任四川綿州判官流寇廖麻  
子攻刼州縣璉率兵禦敵力屈死之事聞贈上林苑監  
丞廕子

鄧進石首人正德初以吏員任四川榮山縣典史鄢賊猖  
獗城陷與子俱死事聞廕子

麥成正德中任安鄉縣典史流賊掠鼎江口成父子集民  
兵禦之比戰馬躡賊叢槊刺之猶徒步手刃數人遂遇  
害子亦死之



周憲安陸州人弘治癸丑進士歷刑部員外郎上疏言事  
調交州通判復職晉郎中正德七年擢大理知府轉江  
西按察副使征華林寨寇策馬先驅援兵不至死之  
賜葬祭于幹亦死于難 詔旌曰孝烈祀旌忠祠

王鼎正德初知永城縣時流賊攻城鼎率衆守禦及城陷  
鼎取印綬繫于身瞑目端坐以待賊入被執不屈死之  
贈官及子

安宣正德中授夏邑縣丞時流賊楊虎等擁衆逼城宣尚  
未至任聞之兼程而進或止之宣以義辭遂入城分守  
及城破死之錄其子

董綸歸德府經歷時逆賊師尚詔潛伏于柘城塘中招集

亡叛日夕剽掠陷府城爲賊所執不屈且罵不置口賊怒殺之妻賈氏與子奎皆遇害贈官建祠

熊驂正德間萊蕪知縣值流賊侵境驂率民衆出戰爲賊所執與主簿韓塘俱不屈死之

陳韜正德間爲登州招遠縣丞值流賊攻掠韜率衆死守城陷被執不屈死之事聞贈登州府通判

王禎吉水人夔州府通判荆襄劇賊石和尚反禎領民壯與戰大敗之越三日賊大集禎曰今日當以死報國復領兵壯衝鋒殊死戰援兵不至遂爲賊所獲禎奮罵不已賊殺之 詔贈夔州府同知錄其子

袁珪正德初任高安主簿善騎射時建昌徐賊聚亂珪承

檄統兵分勦以衆寡不敵死于陣贈知縣從祀節愍祠  
梁奎正德間通判袁州姚源洞賊猖獗奎領兵勦捕奮勇  
力戰歿于陣

王天與正德間寧都知縣逆濠之變率師勤王死于難士  
人塑像祀學宮

王業高以父廕授吉安所副千戶扈蹕從征陞正千戶正  
統己巳調征浙寇于丁公崖遇敵死戰援孤勢窮猶手  
刃數人而死其孫莊剛果有謀嘗平湯存文于萬安殲  
金耀于永豐擒周天鑾于梅花洞正德庚午從征桃源  
拔所佩刀指天畫地誓不與賊俱生領兵至鼓樓舖斬  
獲甚衆進屯梁山師失利指揮徐麟等下馬先遁莊直

前死戰賊勢將却援兵不至力殫死之事聞官其孫爲指揮

王祐正德中知廣昌縣廣寇至民皆逃散勢絕援孤乃引刀自刎其腹曰有城郭不能死守何以生爲左右驚奪其刀後以援至寇稍退越七日復突入祐倉皇赴敵遂死之

鄧俊正德間建昌所千戶桃源盜熾俊奮欲自效戰數合皆利盜陰識之百弩相攻俊馬陷淖泥中盜磔殺之當道上其事優給其子

紀鏞由吏員授福建漳浦縣丞正德丁丑南靖寇熾鏞率兵與戰斬首數千級棄勝抵其穴因遇害事聞贈官錄

子

王廷翰彭澤人正德己卯宸濠作亂遊兵掠境翰挾弓矢率其子弟鄉兵追敵賊有畏心遂擲余干地誘之翰不視奮擊愈厲連射斃二賊對敵終日矢盡力竭身中十餘鎗罵賊不絕口賊乃斷其頭而去

羅明南昌人由吏員授衛知事歷四川劍州判官正德中劇盜鄆藍等數萬人攻城民竄明偕其子介死守孤城不支明被執罵賊就死介奮身救父亦被殺事聞蒙

恩卹廕

李俊饒州守禦正千戶正德庚午桃源盜據險爲亂官兵夾攻次梁山坂時行伍未集賊乘虛突至軍士奔北營

獨奮身直前手刃賊十餘力屈受執罵不絕口其弟李  
二遠馳盡力助兄遂同遇害副千戶高鈺百戶鄭鑑同  
死

唐天恩常熟人舉鄉貢知葉縣劇賊劉六劉七擁衆壓境  
天恩奮戰生擒百餘人戮之旣而援兵不至城破被執  
一門死者六七十人贈光祿少卿廕其子

李情江西按察司副使整飭饒州兵備時桃源降賊復攻  
萬年縣有告賊至請去情曰我憲臣柄兵者寧死不去  
遂遇害同死事者通判秦碧陳遠照磨馬驄指揮邢世  
臣千戶許政等

續文獻通考卷之六十六終